

**Uunga siunnersuut: Filmiliortarneq pillugu Inatsisartut inatsisaat**

*Meeqqanut, Inuusuttunut, Ilinniartitaanermut, Kultureqarnermut, Timersornermut  
Ilageeqarnermullu Naalakkersuisumit saqqummiunneqartoq*

**pillugu****Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap****siunnersuutip aappassaaneerpeqarneranut****TAPILIUSSATUT ISUMALIUTISSIISSUTAA**

Ataatsimiititaliap suliarinninnermini [kingullermik] ilaasortarai:

Inatsisartunut ilaasortaq Najaaraq Møller, Siumut, siulittaasoq  
Inatsisartunut ilaasortaq Hartmann Heilmann, Naleraq, siulittaasup tullia  
Inatsisartunut ilaasortaq Dines Mikaelson, Siumut  
Inatsisartunut ilaasortaq Peter Olsen, Inuit Ataqatigiit  
Inatsisartunut ilaasortaq Edvard Nielsen Aronsen, Inuit Ataqatigiit

UKA2024-mi ulloq 25. september siullermeerinninnerup kingorna ataatsimiititaliap  
siunnersuut misissorpaa.

**1. Siunnersuutip imarisaa siunertaalu**

Kalaallit Nunaanni filmiliortarneq pillugu inatsisitigut sinaakktissanik pilersitsisoqarnissaa  
siunnersuummi matumani Naalakkersuisunit kissaatigineqarpoq, tassuuna filmiliortariaaseq  
inuussutissarsiornikkut porsarsimassutsikkullu tapersorneqassalluni. Taamaaliornikkut  
kalaallit filmilfaat Kalaallit Nunaanni nunanilu allani siammarterneqalerlutillu  
siuarsarneqalissapput.

Siunnersuutip ilusilersorneqarnera Naalakkersuisut filmiliortarneq pillugu suleqatigiissitaasa  
suliaat nassuiaasiaq "Inassuteqaatit qanoq aqqissuussinikkut Kalaallit Nunaanni  
filmiliortarnerup nukittorsaavigineqarnissaa pillugu" naapertorlugu suliarineqarpoq, taanna  
immikkoortut UPA2022/75, UKA2023/46 kiisalu UPA2024/56 piviusunnigortinneqarnerinut  
atatillugu pilersinneqarnikuulluni. Taamaalluni Kalaallit Nunaanni Filminstituttip  
pilersinneqarnissaa siunnersuummi ilaavoq, tassani ilaatigut filmkommission  
pilersinneqassalluni kiisalu nunatsinni filmiliornissamat tapiissuteqarnerit, qinnuteqaatit allallu

pillugit allaffissornerit ingerlatsinermi suliarineqartassallutik, kisiannili aamma instituttip ataani filmiliornermut sulliviup akisussaaffiginissaa.

## **2. Siunnersuutip Inatsisartuni siullermeerneqarnera**

Nunatsinni filmiliorarneq pillugu inatsisiliornikkut sinaakkusiinikkut nukittorsaasoqassasoq nunarpullu filmiliorartunut nunanit allaneersunut pilerinarsarneqassasoq isumaqatigiiffiulluarpoq. Siunnersuutip ilalernerneqarnerata saniatigut ajornartorsiutit assigiinngitsut siullermeerinninnermi eqqartorneqarput. Aningaasaqarnikkut allaffissorinikkullu kingunerisinnaasai oqallinnissamut annertut pissutissaqalersitsipput. Amerlanerussuteqartunit oqaatigineqarpoq Filmiliorarneq pillugu Inatsisartut inatsisaat filmiliorartut nunatsinneersut kissaataannut naammassinnittuussasoq aammalu aningaasat immikkoortinneqartut instituttip aallartilluarnissaanut qulakkeerinnittuussasut.

## **3. Tusarniaanermut akissutit**

Naalackersuisut ilisimatitsissutigaa siunnersuut attuumassutilinnut tusarniutigineqarsimasoq piffissami **17. juni - 15. juli 2024**. Tusarniaanermut akissutit tunniunneqartut inatsisissatut siunnersuummut kakkiullugit ilanngunneqarput, tamanna Inatsisartut Siulittaasoqarfiata ilusiliinissamut piumasaqaataanut naapertuuppoq. Tassunga atatillugu ataatsimiititaliamit maluginiarneqarpoq soqutigisallit tallimat siunnersuummut oqaaseqaateqarsimasut, aammalu kukkusoqarsimanera peqqutaalluni Eqqumiitsuliornermik Aningaasaateqarfik (EA) tusarniaanermi atortussanik tigusaqarsimanngitsoq, taamaalillunilu tusarniaanermut akissummik kingusinnerpaamik ulloq 5. august nassiussinissaminut akuersissummik pissarsilluni. Taamatuttaaq ataatsimiititaliamit maluginiarneqarpoq tusarniaaneq aasaanerani ingerlanneqarsimasoq.

Tusarniaaffigineqartut siunnersuut pitsaasutut kalaallit filmiliorarnerannik siuarsaataasussatut isigigaat ataatsimiititaliamit paasineqarpoq. Maluginiarluguli EA aamma Kommuneqarfik Sermersooq akissutiminni allassimagaat 3.900.000 kr. Kalaallit Nunaanni Filminstituttimut immikkoortinneqarsimasut ajornartorsiutaasoq, tassami kulturimut tapiissutinik ataatsimoortitsinissamut kissaateqarnikkut EA pilersinneqarnikummat.

## **4. Sassartitsinerit**

Film.gl sinnerlugu peqataasut siunnersuut pillugu isiginnittariaasertik ataatsimiititaliamut ulloq 30. September saqqummiuppaat. Sassartitsinerup nalaani Film.gl'p isummersuutai pillugit ataatsimiititaliamut saqqummiisoqarpoq (**ilanngussaq 1**).

Nuuk International Filmfestival aamma Filmiliornermut sullivik Filmiliorarfik sinnerlugu siunnersuut pillugu isummersuutitik ulloq 7. kiisalu 8. oktober saqqummiuppaattaaq.

## **5. Ilisimatitsiffiusumik ataatsimiinnerit Naalackersuisunullu apeqqutit**

Ataatsimiititaliap siunnersuummik suliarinninneranut atatillugu Meeqqanut, Inuusuttunut, Kultureqarnermut, Ilinniartitaanermut, Timersornermut Ilageeqarnermullu Naalakkersuisoq ulloq 14. oktober 2024-mi kiisalu ulloq 25. oktober 2025 ataatsimiititaliamit ataatsimeeqatigineqarpoq. Ilisimatitsiffiusumik ataatsimeeqatiginissamut aggeqqusissutip aammalu ataatsimiinnermi eqqartorneqartut pillugit apeqqutinut akissuteqaataasa assilineri isumaliutissiissummut matumunnga **ilanngussaq 2-itut, 3-tut, 4-tut, 4.1-itut, 5-itut aamma 6-itut** kakkiunneqarput.

## 6. Siunnersuutip ilusiligaanera

Naalakkersuisut allannguutissatut siunnersuutiniq siunnersuummullu erseqqissaassuteqarlutik saqqummiussinerat ataatsimiititaliamit naammagisimaarneqarpoq. Tamatuma kinguneraa siunnersuut oqaaseqaatillu nalinginnaasut pillugit naqqiissummik ulloq 18. september 2024 nassiussisoqarsimaneq.

## 7. Ataatsimiititaliap siunnersuummik suliarinninnera

Filmiliortarneq pillugu inatsisissaq tapersernejarluartoq ataatsimiititaliamit maluginiarneqarpoq, kisiannili aamma maluginiarneqarluni siunnersuummi pissutsit assigiinngitsut pillugit erseqqissaassuteqartoqarnissaanik ujartuisoqartoq. Tassunga ilaallutik aningaasaqarnikkut kingunerisassai, siulersuisut katiterneqarnerat innersuunneqarsinnaasullu, Eqqumiitsuliornermut Aningaasaateqarfimmiit aningaasat tapiissutissatut immikkoortinneqartut, filminut toqqorsivik filmiornissamullu akuersissuteqarnissamut piumasaqaatit. Inatsisissatut siunnersuut **sinaakkutissatut inatsisaasoq** ataatsimiititaliamit aamma maluginiarneqarpoq, taamaattumik **aalajangersagassartai Naalakkersuisunit aalajangerneqassallutik**. Filmiliortarnerup teknikitigut sukkasuumik ineriartornera taamaattumillu atugassarititaasut allanngoriartorneri Naalakkersuisunit tamatumunnga tunngavilersuutigineqarpoq. Taamaattumik nalunaarusiornikkut aaqqiissuteqartoqarnissaa pisariaqassaaq.

### 7.1 Filminstitutti aamma filmkommissær

Siunnersuummi § 5, imm. 1, filminstitutti pisortat suliffeqarfiat namminersortut aalajangerneqarpoq. Tamanna Kalaallit Nunaanni Filminstituttimut tunngassuteqassaaq, tassani suliassarineqassalluni **nunatsinni filmiliortartut siuarsarneqarnissaat aamma tapersernejarnissaat**, tassunga ilanngullugit piginnaasalinnik ineriartortitsineq, tuniniaaneq, saqqummiussinerit aammalu kalaallit filmiliaannik ineriartortitsineq. Instituttip **pilersinneqarnissaanut aningaasaliissutit ukioq 2025-mut aningaasaqarnikkut tamakkiisumik qulakkeerinnittoqarsimannitsoq** Inatsisartut siullermeerinninnerini uparuarneqarpoq. Taamaattumik inatsit akuerineqassappat filmiliortarnerup siuarsarneqarnissaanut siunnersuummi siunertarineqartup naammassinngitsoorneqarnissaa **ernummatigineqarpoq**.

Siunnersuummi § 5-imi ima allassimasoqarpoq:

§ 5. *Kalaallit Nunaanni Filminstituttip siunertaraa:*

1) *siuarsassallugu filmiortarneq, filmertarnerup kulturia aamma nunatsinni filmertarfeqarnermi kulturi,*  
(Ataatsimiititaliamit erseqissarneqartut)

Filmertarfeqarnermi kulturi Kalaallit Nunaanni piffinni ikittuinnarni filmertarfeqartuni periarfissaasoq ataatsimiititaliamit ilisimaneqarpoq. Taamaattumik ataatsimiititaliamit Naalakkersuisunut kaammattuutigineqarpoq siunnersuutip pingajussaaneernejarnissaanut § 5-imi imm. 1, nr. 1 aalajangersakkamut allannguutissatut siunnersuummik saqqummiussissasut, taamaalilluni ”*filmfestivaleqartitsisarnikkut kulturi*” aalajangersakkamut tassunga ilanngunneqarluni. Naalakkersuisunut taamatut kaammattuuteqarluni ataatsimiititaliap kissaataasa ilagaat sumiiffinni filmertarfissuaqanngitsuni filmfestivaleqartitsisarnikkut kulturip siuarsarneqartarnissaa Kalaallit Nunaanni Filminstituttip siunertaasa ilagissagaat.

## 7.2 Filminut toqqorsivik

**Kalaallit filmiliaasa tammatsaalineqarnissaat, tak. §5,** qulakkeerneqassasoq siullermeerinninnermi kissaatigineqarpoq, taamaalilluni filminik tammatsaaliuinerup allaffissornertaa **filminstituttimit** isumagineqassalluni. Tamatumunnga Film.gl’p tusarniummut akissutaa ilaatigut tunngavilersuutigineqarpoq, tassunga ilanngullugu atuakkanik atorniartarfiit pillugit inatsimmi aalajangersakkani kalaallit filmiliaannik tammatsaaliuinissaq ilaanngitsoq **Nunatta Atuagaateqarfiani** kalaallit filmiliaannik piorsarsimassutsikkut kalaallit inuiaqatigiivinit nalituut pillugit paasisimasat nukissallu pisariaqartinneqartut pigineqannginneri peqqutigalugu. Tassunga tunngatillugu Naalakkersuisut tusarniaanermit allakkiami paasisimasallit nukissallu amigaataanerat ilumuunnginnerarsimagaat ataatsimiititaliamit maluginiarneqarpoq.

Siullermeerinninnermi kissaatigineqartoq tassaavoq **kalaallit filmiliaannik tammatsaaliuineq, tak. §5,** qulakkeerneqartariaqartoq, taamaalilluni allaffissorneq **filminstituttimit suliarineqartussanngorluni.** Tamanna ilaatigut ima tunngavilersorneqarpoq atuakkanik atorniartarfiit pillugit inatsimmi aalajangersakkani kalaallit filmiliaannik tammatsaaliuinissaq ilaanngitsoq **Nunatta Atuagaateqarfiani** kalaallit filmiliaannik piorsarsimassutsikkut kalaallit inuiaqatigiivinit naleqartut pillugit paasisimasat nukissallu pisariaqartinneqartut pigineqannginneri peqqutigalugu.

## 7.3 Filmiliortarfik

Filmiliortarfiup filminstituttimut nuunneqarnissaa pillugu siullermeerinninnermi ernummatigineqarpoq. Ataatsimiititaliaq aamma taama isumaqarpoq maluginiarlugulu nuussinerup nassatarisinnaagaa Filmiliortarfiup immikkut ilisimasai suliaalu filminstituttimut nuunnermi annaaneqarsinnaasut.

Naalackersuisunut kaammattuutigineqarpoq siunnersuutip pingajussaaneernejarnissaanut § 5-imi imm. 1, nr. 9-imi aalajangersakkamat allannguutissatut siunnersuummik saqqummiussissasut, taamaalilluni filminstituttip filmiortarfimmik ingerlatsinissaa aalajangersakkamiit peerneqarluni.

#### 7.4 Siulersuisut

Siunnersuummi §7-imi ima allassimasoqarpoq:

*§ 7. Kalaallit Nunaanni Filminstitutti aqunneqarpoq siulersuisunit 5-inik ilaasortalinnit, ataatsimut **tamarmik filmiliornermut tunngasunik ilisimasaqarluartunik, aamma tusagassiornermik ingerlatsinermik, ussassaarisarnermik, suliffeqarfimmik ingerlatsinermik, aningaasaqarnermik aqutsinermillu ilisimasaqarluartunik.***

(Ataatsimiititaliamit erseqqissarneqartut)

Ilutigisaanik ataatsimiititaliamit maluginiarneqarpoq siunnersuummi § 8, imm. 1-imi ima allassimasoqartoq:

*§ 8. Naalackersuisut inassuteqaatitaqanngitsumik siulersuisuni siulittaasumik toqqaasarput. Siulersuisuni ilaasortat sinneri imatut toqqarneqartassapput:*

- 1) Ilaasortaqaq ataaseq Film.gl -imit inassuteqaat naapertorlugu.*
- 2) Ilaasortaqaq ataaseq Kalaallit Nunaanni Eqqumiitsuliornermut Aningaasaateqarfimmit inassuteqaat naapertorlugu.*
- 3) Ilaasortaqaq ataaseq isiginnaartitsisartut peqatigiiffianiit SILA-mit inassuteqarnikkut.*
- 4) Ilaasortaqaq ataaseq Sulisitsisunit NUSUKA-miillu ataatsimut inassuteqarnikkut.*

*Imm. 2. Inassuteqaataasut naapertorlugit siulersuisuni ilaasortanngortut akornannit siulersuisut siulittaasup tullissaa qinertassavaat.*

(Ataatsimiititaliamit erseqqissarneqartut)

Siulersuisunut inassuteqaatigineqarsinnaasut filmiliornermut tunngasunik ilisimasaqarluartuussasut, soorlu inuussutissarsiornermut eqqumiitsuliornermullu tunngasunik, ataatsimiititaliamit paasineqarpoq. Siullermeerinninnerup nalaani erseqqissaatigineqarpoq kattuffeqarnissaq imaluunniit suliffeqarfimmik **nunat tamalaat akornanni inuussutissarsiornikkut paasisimasalimmik** peqarnissaq **pingaaruteqartoq**, soorlu assersuutigalugu **Visit Greenland** Kalaallit Nunaata attaveqaatitigut avammut pilerinarsarnissaanut annertuumik pikkoriffeqartoq. Taamatuttaaq ataatsimiititaliamit maluginiarneqarpoq Film.gl'p tusarniaanermut akissutaani allaqqasoq Visit Greenland inassuteqaatigineqarsinnaalluortoq, kisiannili Sulisitsisut aamma NUSUKA

pissusissamisoornerpaajussasut Naalackersuisut tusarniaanermut allakkiaminni allassimasoq aalajangiusimaannaraat, Visit Greenlandip toqqarneqarnissani kissaatiginikuunngimmagu.

Ataatsimiititaliamit aamma maluginiarneqarpoq **siulersuisunut ilaasortat pillugit piumasagaatit aammalu najugaqavissuunissaannut piumasagaatit** siunnersuutip siullermeerneqarnerani eqqartorneqartut. Siunnersuummi § 9-mi ima allassimavoq, siulersuisunut ilaasortat Kalaallit Nunaanni najugaqartuussasut.

Sassartitsisoqartarneri tungavigalugit **siulersuisut ukiunut sisamanut ilaasortaatinneqarlutik inissinneqarnera** tak. § 11, ataatsimiititaliami eqqartorneqarpoq. Ataatsimiititaliamit ima paasineqarpoq siulersuisuni ilaasortat filminik suliaqartartussat eqqarsaatigalugit **ukiuni marlunni** ilaasortaasarneq pissusissamisoornerpaajussasoq, taakkuami ilaasortaanerminni filminut tapiissutissanik qinnuteqarsinnaassanngillat inuussutigalugillu. Ilaasortat filmiornermik suliaqartartut ilaasortaajunnaaraangamik aningaasanik tapiissutinik qinnuteqarnissaminnut periarfissagissaarnerussapput. Tamanna ima isumaqassaaq inuit filmiortartut filmiortartuunertik inuussutigisinnaalissavaat Kalaallillu Nunaanni filminik siuarsaaqataasinnaalissallutik.

Ataatsimiititaliap isumaqatigiittup **Naalackersuisut kaammattuuteqarfigai** siunnersuutip matumani pineqartup pingajussaaneerneqarnissaanut allannguutissatut siunnersuuteqaqqullugit, taamaalilluni siulersuisut ilaasortaatinneqartarnerat **ukiunut marlunnut** appartinneqarsinnaalissalluni.

Ataatsimiititaliamit ima paasineqarpoq siulersuisuni ilaasortat minnerpaamik ukiuni tallimani Kalaallit Nunaanni najugaqareersimasuussasut, **Naalackersuisunullu kaammattuutigalugu** allannguutissatut siunnersuusiussatut taamaalilluni siulersuisunut najugaqartuunissamat piumasagaat **minnerpaamik ukiunut tallimanut aalajangiunneqassasoq**.

Kalaallinut ilinniagaqarneq assigisaaluunniit peqqutaalluni nunatta avataniittariaqarsimasunut ukiuni tallimani najugaqarsimasussaataitanermut piumasagaat atuutsinneqannginnissaa ataatsimiititaliamit pingaartinneqarpoq.

### 7.5 Attuumassuteqartuunissamat piumasagaat

Kalaallit producentit pillugit siunnersuummi §3, imm. 3-mi **attuumassuteqartuunissamat piumasagaatip** sukateriffigineqarnissaanut siullermeerinninnerup nalaani kissaateqartoqarnera ataatsimiititaliamittaaq maluginiarneqarpoq. Aalajangersagaq taanna aamma sukateriffigineqassasoq ataatsimiititaliamit paasineqarpoq.

Ataatsimiititaliap isumaqatigiittup Naalackersuisunut kaammattuutigaa siunnersuutip pingajussaaneerneqarnissaanut allannguutissatut siunnersuuteqaqqullugit, taamaalilluni

kalaallit producentit pillugit attuumassuteqartuunissamut piumasaqaatit sukateriffigineqarlutik.

### 7.6 Aningaasat tapiissutit utertitsisarnerlu

Siunnersuummi § 18-imi allassimavoq, aningaasaliissutit Kalaallit Nunaanni Filminstituttimeersut anguniakkanut eqqortunut atorneqarpata anguniakkanut immikkut ittunut aningaasatigut tapiissutit qulakkeerneqassasut. Tassunga ilanngullugit filmit aliikkutassiat, filmit naatsuliat aamma piviusulersaarutit imaluunniit tapiissutit allat, soorlu ussasaarinnermut saqqummersitsinermullu.

Siunnersuut akuerineqassappat **Eqqumiitsuliornermut Aningaasaateqarfiup tapiissutit aningaasaataanit 3,9 mio. koruunit filminstituttip nammineq tapiissutit aningaasaataanut nuunneqartussanngorlugit** malitseqarnissaa Inatsisartuni siullermeerinninnerup nalaani naammaginangitsutut oqaatigineqarpoq. Taakkua 3,9 mio. kr. allamiit nassaarineqaqullugit ilaatigut kissaateqartoqarpoq.

Ataatsimiititaliaq tassunga isumaqataavoq **Naalakkersuisullu kaammattuuteqarfigalugit** Eqqumiitsuliornermik Aningaasaateqarfimmiit 3,9. mio. koruunit nuunneqassanngitsut kisiannili 2026 aallarnerfigalugu aningaasaliissutissanik nutaanik nassaartoqassasoq.

**Utertitsisarneq** siullermeerinninnermi tigulluarneqarpoq. Utertitsisarnermut aqqissuussaq **producentinut nunanit allaneersunut** atorneqartussanngorlugu suliaasoq, ilutigisaanillu instituttip **tapiissuteqartarnera kalaallinut producentinut** atorneqartussanngorlugu suliaasoq ataatsimiititaliamit maluginiarneqarpoq. Ataatsimiititaliamit imatut paasineqarpoq, producentinut nunanit allaneersunut utertitsisarnermut aqqissuussaq filmiliorluni sulianut anginerusunut soqutiginarsaataassasoq tamannalu aamma kalaallit filminik suliaqartarnerannut iluaqutaasussaasoq.

### 7.7 Kalaallit Nunaanni filmiliornermut qinnuteqaatit nalunaarsuinerlu

Siunnersuummi § 30-mi ima allassimasoqarpoq, **kikkut tamarmik** aningaasarsiutigalugu **filmiliornermut qinnuteqartassasut**. Tamanna kikkunnut tamanut atuutissaaq, tassunga ilanngullugit **kalaallit filmiliaat**, tamannali tusagassiorluni suliaqarnermut atasuni atuutinngilaq. § 30, imm. 2 ataani ima allassimasoqarpoq, Kalaallit Nunaanni filmiliorumalluni qinnuteqaateqartarneq pillugu, matumani ilanngullugu immikkut pisoqartillugu akuersissutit pillugit piumasaqaatinik sanequtsisinnaanermut Naalakkersuisut ersarinnerusunik malittarisassiussasut. Kalaallit filmiliaat aalajangersakkami ilaasariaqanngikkaluartut siullermeerinninnermi uparuarneqarpoq, qinnuteqaatit suliarineqarnerini allaffissornerup annikinnerulernissaanut tamassuma iluaqutaasinnaanera pequtigalugu.

Taamaattumik ataatsimiititaliaq Naalakkersuisunut kaammattuuteqarpoq siunnersuutip

pingajussaaneernejarnissaanut allanguutissat siunnersuummik saqqummeeqqullugit, taamaalilluni kalaallit filmiliortartut qinnuteqaqqaarnissamut nalunaarsuinissamullu piumasaqaammut ilaatinneqartariaqarnatik.

### **8. Siunnersuutip aningaasatigut kingunerisassai**

Siunnersuutip piviusunnngortinneqarnerani aningaasatigut kingunerisinnaasai siunnersuutip oqaaseqaataani nalinginnaasuni allaqqapput.

**Siunnersuut 2025-mut aningaasalersorneqarnissaanut periarfissanik misissuisoqassasoq** ataatsimiititaliap paasivaa.

Tassunga atatillugu siulersuisunik aatsaat 1. april 2025 aallarnerfigalugu pilersitsoqarnissaa naatsorsuutigineqartoq ataatsimiititaliamit maluginiarneqarpoq, tamannalu ima isumaqarluni **2025-mi** akissarsiassanut aningaasartuutissanullu allanut aningaasartuutissat **162.500 kr.-nik** annikinnerussasut.

Ilutigisaanik Naalakkersuisup naatsorsuutigaa Instituttip aqutsisussaa sulisussallu allat aatsaat 2025-mi ukiakkut atorfinitsinneqarsinnaassasut. **2025-mi sulisunut** aningaasartuutissat 675.000 kr.-usussatut naatsorsorneqarput, taamatullu ukiumoortumik 2.100.000 mio. kr.-usussatut naatsorsorneqarput. Instituttimut **2025-mi aningaasartuutissat allat** 600.000 kr.-usussatut naatsorsorneqassasut naatsorsuutigineqarpoq, taamatullu ukiumoortumik 1.700.000 mio. kr.-usussatut naatsorsorneqarput.

Taamaattumik **2025-mut 1.438.500 mio. kr.-inik aningaasalersorneqarnissaanut periarfissanik ujartuisoqassasoq** ataatsimiititaliamit maluginiarneqarpoq.

Ataatsimiititaliap maluginiarpaa instituttimut 2026-mi tapiissutitut aningaasaliissutit **3.900.000 mio. kr.-usut Eqqumiitsuliornermut Aningaasaateqarfimmit** (EA) nuunneqartussaasut. Eqqumiitsuliornermik ingerlatsinermit Naalakkersuisut tapiissutitut aningaasaliissutai EA-mit allaffissornikkut aqunneqartarput, taakkua qinnuteqartut malillugit agguarneqartarput, aammalu eqqumiitsuliornermik suliaqartartunut tamanut Eqqumiitsuliornermik ingerlatsineq pillugu Inatsisartut inatsisaanni ilaasunut attuumassuteqarluni. Aningaasaliissutinik nuussinissaq Eqqumiitsuliornermik Aningaasaateqarfiup, Kommuneqarfik Sermersuup tusarniaanermut akissutaanni aammalu siunnersuutip Inatsisartuni siullermeerneqarnerani ajornartorsiutaasussatut uparuarneqarpoq.

Tamatuma saniatigut ataatsimiititaliap maluginiarpaa **Filmiliortarfiup** Naalakkersuisunit aamma Kommuneqarfik Sermersuomit tapiissutitut aningaasaliissutit pissarsiarisartagai 800.000 kr.-usut **ingerlaannassappata aatsaat allanik aningaasaleeqataasooqartassappat pissarsiarineqartassapput**. Piumasaqaataasooq taanna naammassineqarsinnaanngippat Nunatta Karsianiit Filmiliortarfimmut aningaasaliissutit qaffanneqartariaqassapput.



## 9. Ataatsimiititaliap inassuteqaatai

- Allanguutissatut kaammattuutit qulaani taaneqartut Naalakkesuisut saqqummiutereerpatigit siunnersuutip ilusimisut iluseqartillugu akuersissutigineqarnissaa ataatsimiititaliap isumaqatigiittup Inuit Ataqtigiit, Siumup Naleqqallu inassutigaa.
- Inatsisartut suliarinninnerat tunngavigalugu Inatsisartut inaarutaasumik pingajussaaneerinnillutik suliarinninnissaat sioqqullugu Kultureqarnermut, Ilinniartitaanermut, Iisimatusarnermut Ilageeqarnermullu Ataatsimiititaliamut suliarineqaqqittussanngorlugu inatsisissatut siunnersuut ingerlateqqinneqassasoq **ataatsimiititaliamit inassutigineqarpoq.**

Taama oqaaseqarluni isumaliutissiisummilu allassimasunut paasinnilluni ataatsimiititaliap siunnersuut aappasaaniigassanngortippaa.

---

Najaaraq Møller  
Siulittaasoq

---

Hartmann Heilmann  
Siulittaasup tullia

---

Dines Mikaelen

---

Peter Olsen

---

Edvard Nielsen Aronsen